



Rimnada sistematica da dretg communal dalla vischnaunca da Sagogn

Numera **2100.01.01**

Tetel **Uorden disciplinar scola Sagogn**

Edizium Edizium dils 17-09-2020

Remplazza igl uorden dils 01-08-2005

Remplazza igl uorden dils 04-01-1997

Remplazza igl uorden dils 05-10-1979

**Entrada en
vigur** 01-10-2020

Remarcas preliminaras

Ord motivs da simplificaziun serefereschan indicaziuns da personas, funcziuns e mistregns en questa publicaziun uffiziala mintgamai sin omisduas schlatteinas, expriu ch'ei vegn menziunau explicit zatgei auter.

Davosa correctura informala 10.03.2024 tras Thomas Candrian

Cuntegn

I. Disposiziuns generalas	3
II. Reglas da cumpurtament	4
III. Cumpetenzas, castitgs disciplinars, proceder	6
IV. Disposiziuns finalas e transitorias	8

Sebasond sin art. 13 dalla lescha da scola dalla vischnaunca da Sagogn e sin art. 50 dalla lescha davart las scolas popularas dil cantun Grischun relai il cussegl da scola quest uorden disciplinar.

Las denominaziuns scolaras resp. scolar e scola cumpeglian ils affons da scoletta e la scoletta, schinavon ch'ei dat buca disposiziuns cuncontrastontas.

I. DISPOSIZIUNS GENERALAS

Intent

Art. 1

¹ Igl uorden disciplinar gida ensemen cun la lescha da scola ed igl uorden da casa dalla vischnaunca da Sagogn ad ademplir igl intent dalla scola tenor art. 2 dalla lescha davart las scolas popularas dil cantun Grischun.

² El reglescha ils dretgs e las obligaziuns dallas scolaras e dils scolar tenor art. 53-55 dalla lescha da scola cantunala e sustegn las personas d'instrucziun da cumplenir lur obligaziuns tenor art. 59 dalla lescha da scola cantunala sco era da garantir in menaschi da scola ordinau ed efficient.

³ Plinavon reglescha el las cumpetenzas dallas autoritads da scola, dalla direcziun da scola e dallas personas d'instrucziun sco era il proceder en cass che scolar cunterfan alla disciplina da scola.

Camp
d'applicaziun

Art. 2

¹ Igl uorden disciplinar vala per tut las scolaras e tut ils scolar dalla scola publica dalla vischnaunca da Sagogn.

² Scolaras e scolar d'ordeifer suttastattan medemamein allas disposiziuns da quest uorden disciplinar, schinavon ch'els passentan il temps per motivs da scola sin igl areal dalla scola da Sagogn.

II. REGLAS DA CUMPURTAMENT

Disciplina da scola **Art. 3**

¹ Las scolaras ed ils scolars secumportan durant l'instrucziun e sin il viadi a scola adina bein. Els ein gentils e tolerants. Els vegnan a scola fleghegiai e vestgi correctamein.

² Da principi van els a scola a pei. Sin fundament d'ina damonda giustificada sa il cussegl da scola lubir excepziuns. Per il viadi a scola han ils geniturs l'obligaziun da tgira.

³ Las scolaras ed ils scolars risguardan las disposiziuns da quest uorden disciplinar e suondan immediat las instrucziuns da scolastas e scolasts, dallas autoritads da scola e dad autras persunas emploiadas dalla vischnaunca da Sagogn.

⁴ Ils temps d'instrucziun ston vegnir risguardai. Ins astga bandunar igl areal da scola durant pausa mo cun la lubientscha explicita dalla scolasta resp. dil scolast da classa.

⁵ Las scolaras ed ils scolars tralasan tut las activitads che disturban il menaschi da scola.

⁶ Objects prigulus (cuntials ni autras armas) ein scumandai ton en casa da scola sco era sin igl entir areal da scola incl. la halla polivalenta. Las persunas d'instrucziun san lubir excepziuns per incumbensas specificas (per exempel per excursiuns, camps, dis da project, etc.).

⁷ Durant il temps da scola astgan ins buca carrar sin igl areal da scola.

Localitads,
indrezs, urdeins

Art. 4

¹ Ils uordens da casa dalla vischnaunca da Sagogn che concernan il complex da scola e la halla polivalenta ston vegnir risguardai.

² Las scholaras ed ils scolars ston haver quitaun dils indrezs dil complex da scola e dalla halla polivalenta, dil mobiliar e dils apparats (electronics) sco era dil material da scola. Sche enzatgei vegn donnegiau cun nauscha intenziun, stattan buns ils geniturs ni ils responsabels per l'educaziun.

³ Las scholaras ed ils scolars astgan buca duvrar apparats electronics privats (smartphones, smartwatches, etc.) durant l'instrucziun en casa da scola da Sagogn ed en general independentamein dil liug. Sche enzatgei riguarda buca quella regla, san las persunas d'instrucziun confiscar ils apparats e returnar els als responsabels per l'educaziun tenor convegnas. Las persunas d'instrucziun san lubir l'utilisaziun per incumbensas specificas limitadas temporalmeins.

⁴ Da principi astgan las scholaras ed ils scolars far pensums da casa cun igl iPad dalla scola. Quei denton sulettamein cun la lubientscha ed igl avis (reglas da diever enconuschentas als affons) dalla persuna d'instrucziun. Ils affons ston haver quitaun digl apparat e mo els astgan duvrar el a casa per far ils pensums da scola ni per emprender a distanza. Sch'igl iPad vegn donnegiaus a casa, sto quei vegnir annunziat alla persuna d'instrucziun. En quei cass ston ils geniturs surprendre ils cuosts per ils donns caschunai che resultan dalla reparatura ni dil remplazzament digl apparat.

⁵ Igl ei scumandau explicitamein da derasar cuntegns electronics illegals. Surpassaments vegnan annunziati.

Drogas

Art. 5

¹ Igl ei scumandau sin igl entir areal da scola da consumar drogas da tut gener (fimar, trer tubac, e-cigarettas) sco era da beiber bubrondas alcoholicas durant il temps d'instrucziun e durant occurrenzas da scola.

III. CUMPETENZAS, CASTITGS DISCIPLINARS, PROCEDERCastitgs
disciplinars**Art. 6**

¹ Surpassaments dalla lescha da scola, digl uorden disciplinar e digl uorden da casa san haver per consequenza ina reprimanda ed igl ei pusseivel ch'ils responsabels per l'educaziun vegnan informai.

² Las scolaras ed ils scolars san vegnir castigai cun incumbensas specialas.

Cumpetenzas

Art. 7

¹ Las persunas d'instrucziun san disponer ina reprimanda en scret ni a bucca, incumbensas specialas ni in arrest tochen in mezz di.

² La direcziun da scola sa castigar ina scolara ni in scolar cun incumbensas specialas durant maximalmein quater mezz dis.

³ Tenor las directivas concernent absenzas, congedi e dispensaziun dall'instrucziun dil cantun Grischun sa il cussegl da scola pretender digl inspectorat da scola d'exclauder scolaras e scolars dall'instrucziun.

Fatgs, udida
giuridica

Art. 8

¹ Il gener e las circumstanzas dil surpassament disciplinar ston vegnir scleri. Ins sto conceder l'udida giuridica alla scolara ni al scolar.

² Sch'il castitg ordinau cuoza dapli che dus mezs dis, ston ils representants legals vegnir tedlai avon che prender la decisiun definitiva.

³ Sin damonda ston ins emetter ina decisiun, encunter la quala ins sa recuorer.

Recuors

Art. 9

¹ Encunter decisiuns da castitgs disciplinars d'ina persuna d'instrucziun san ins far recuors enteifer 10 dis da lavur tier la direcziun da scola.

² Encunter decisiuns da castitgs disciplinars dalla direcziun da scola san ins far recuors enteifer 10 dis tier il cussegl da scola.

³ Encunter decisiuns da castitgs disciplinars dil cussegl da scola san ins far recuors enteifer 10 dis tier il Departament d'educaziun, cultura e protecziun digl ambient dil Grischun.

Execuziun

Art. 10

¹ Las personas d'instrucziun ein responsablas per l'execuziun dil castitg disciplinar ch'ellas han ordinau. Ellas san surdar l'execuziun ad in'autra persuna d'instrucziun ni a tiarzs.

Annunzia

Art. 11

¹ Il cussegl da scola, la direcziun da scola e las personas d'instrucziun han il dretg, e tut tenor la grevezia dil cass l'obligaziun, d'annunziar il cass alla polizia ni d'informar las autoritads da protecziun d'affons e da carschi.

IV. DISPOSIZIUNS FINALAS E TRANSITORIAS

Art. 12

¹ Quei uorden disciplinar entra en vigur igl 1. d'october 2020. El remplazza igl uorden disciplinar dalla vischnaunca da Sagogn digl 1. d'uost 2005.

Ediu tras	cussegl da scola	ils	17-09-2020
Acceptau tras	cussegl da scola	ils	17-09-2020
Approbau tras		ils	
Publicaziun officiala dalla vischnaunca da Sagogn.			